

**ХУУЛЬ ЗҮЙ, ДОТООД ХЭРГИЙН САЙД,
САНХҮҮГИЙН ЗОХИЦУУЛАХ ХОРООНЫ ДАРГЫН
ХАМТАРСАН ТУШААЛ**

2012 оны 02 сарын 01 өдөр

Дугаар А/23/24

Улаанбаатар хот

Журам батлах тухай

Санхүүгийн зохицуулах хорооны эрх зүйн байдлын тухай хуулийн 6.1.2, Жолоочийн даатгалын тухай хуулийн 26.4 дэх заалтыг тус тус үндэслэн ТУШААХ нь:

1. "Монгол Улсын нутаг дэвсгэрээр дамжин өнгөрөх болон түр хугацаагаар орж ирж байгаа авто тээврийн хэрэгсэл эзэмшигч, өмчлөгчийг жолоочийн даатгалд хамруулах журам"-ыг хавсралтаар баталсугай.

2. Энэ журмыг 2012 оны 02 дугаар сарын 15-ны өдрөөс эхлэн дагаж мөрдсүгэй.

3. Энэхүү журмын биелэлтэд хяналт тавьж ажиллахыг Хил хамгаалах ерөнхий газар/Ц.Сэргэлэн/, Даатгалын газар/С.Ганболд/, олон нийтэд мэдээлэхийг Тамгын газарт тус тус даалгасугай.

ХУУЛЬ ЗҮЙ, ДОТООД ХЭРГИЙН
САЙД

САНХҮҮГИЙН ЗОХИЦУУЛАХ
ХОРООНЫ ДАРГА

Ц.НЯМДОРЖ

Д.БАЯРСАЙХАН

**МОНГОЛ УЛСЫН НУТАГ ДЭВСГЭРЭЭР ДАМЖИН ӨНГӨРӨХ БОЛОН ТҮР
ХУГАЦААГААР ОРЖ ИРЖ БАЙГАА АВТО ТЭЭВРИЙН ХЭРЭГСЭЛ
ЭЗЭМШИГЧ, ӨМЧЛӨГЧИЙГ ЖОЛООЧИЙН ДААТГАЛД
ХАМРУУЛАХ ЖУРАМ**

Нэг. Нийтлэг үндэслэл

1.1. Монгол Улсын нутаг дэвсгэрээр дамжин өнгөрөх болон түр хугацаагаар нэвтэрч байгаа /цаашид "Улсын хилээр нэвтэрч байгаа" гэх/авто тээврийн хэрэгсэл эзэмшигч, өмчлөгчийг даатгалд хамруулах, Жолоочийн даатгалын тухай хуулийг хэрэгжүүлэхтэй холбогдон үүссэн харилцааг зохицуулахад энэхүү журмын зорилго оршино.

1.2. Монгол Улс гишүүнээр нь элсэн орсонолон улсын албан журмын даатгалын холбооны гишүүн орны даатгалын эрх бүхий байгууллагад даатгуулсан этгээд нь Жолоочийн даатгалын тухай хуулиар тогтоосон даатгалд хамрагдахгүй байж болно.

Хоёр. Хилийн бүсэд даатгалын үйл ажиллагаа явуулах

2.1. Улсын хилээр нэвтэрч байгаа автотээврийн хэрэгсэл эзэмшигч, өмчлөгчийг жолоочийн даатгалд хамруулах үйл ажиллагааг хилийн зурвас (боомт)-т хилийн цэргийн ангиас тогтоон өгсөн хэсэгт зохион байгуулна.

/Энэ хэсгийг ХЗДХС, СЗХ-ны даргын 2024 оны 12 дугаар сарын 30-ны өдрийн А/146/499 дүгээр хамтарсан тушаалаар өөрчлөн найруулсан./

2.2. Даатгалын зуучлагч компани нь хилийн зурвас (боомт)-т үйл ажиллагаа явуулахдаа Монгол Улсын Хилийн тухай хуулийн 26 дугаар зүйлийн 26.2.3-т заасны дагуу Хил хамгаалах байгууллагаас зөвшөөрөл авна.

/Энэ хэсэгт ХЗДХС, СЗХ-ны даргын 2024 оны 12 дугаар сарын 30-ны өдрийн А/146/499 дүгээр хамтарсан тушаалаар өөрчлөлт оруулсан./

2.3. Улсын хилийн халдашгүй дархан байдлыг хангах, хилийн бүсэд мөрдөх журмыг хэрэгжүүлэхийн тулд авто тээврийн хэрэгсэл эзэмшигч, өмчлөгчийг Монгол Улсын нутаг дэвсгэрээр дамжин өнгөрөх, түр хугацаагаар улсын хилээр нэвтрэх тухайн боомтын чиглэлд даатгалд хамруулах үйл ажиллагааг даатгалын зуучлагч хэрэгжүүлнэ.

/Энэ хэсэгт ХЗДХС, СЗХ-ны даргын 2024 оны 12 дугаар сарын 30-ны өдрийн А/146/499 дүгээр хамтарсан тушаалаар өөрчлөлт оруулсан./

2.4. Даатгагч, даатгуулагчийн ашиг сонирхлыг төлөөлөн хилийн зурвас (боомт)-т үйл ажиллагаа явуулах даатгалын зуучлагч компани нь 3 буюу түүнээс дээш даатгагчийн бүтээгдэхүүнийг харилцагч, үйлчлүүлэгчид санал болгон зуучилна.

/Энэ хэсгийг ХЗДХС, СЗХ-ны даргын 2024 оны 12 дугаар сарын 30-ны өдрийн А/146/499 дүгээр хамтарсан тушаалаар өөрчлөн найруулсан./

2.5. Хил хамгаалах ерөнхий газар нь нээлттэй сонгон шалгаруулалтын шалгуур үзүүлэлтийг Санхүүгийн зохицуулах хөрөөтэй харилцан зөвшилцөнө.

/Энэ хэсгийг ХЗДХС, СЗХ-ны даргын 2024 оны 12 дугаар сарын 30-ны өдрийн А/146/499 дүгээр хамтарсан тушаалаар хассан./

2.6. Хилийн зурвас (боомт)-т үйл ажиллагаа явуулж буй даатгалын зуучлагч компани нь хилийн зурвас (боомт)-т мөрдөх журмыг хэрэгжүүлэх, хилийн асуудлаар байгуулсан Монгол Улсын олон улсын гэрээ, хилийн тухай бусад хууль, тогтоомжийг хэрэгжүүлэхтэй холбоотой хилчдийн тавьсан шаардлагыг биелүүлэх үүрэгтэй.

/Энэ хэсгийг ХЗДХС, СЗХ-ны даргын 2024 оны 12 дугаар сарын 30-ны өдрийн А/146/499 дүгээр хамтарсан тушаалаар өөрчлөн найруулсан./

Гурав. Албан журмын даатгалд хамрагдах

3.1 Монгол Улсын нутаг дэвсгэрээр дамжин өнгөрөх болон түр хугацаагаар нэвтэрч байгаа авто тээврийн хэрэгслийн эзэмшигч, өмчлөгч нь Жолоочийн даатгалын тухай хуульд заасны дагуу бусдын амь нас, эрүүл мэнд, эдхөрөнгийн өмнө хүлээх хариуцлагаа жолоочийн албан журмын даатгалд хамруулна.

3.2 Монгол Улсын нутаг дэвсгэр дээр байнга оршин суудаггүй гадаадын иргэн, харьяалалгүй этгээдийн эзэмшил, өмчлөлд байгаа болон Монгол Улсын авто тээврийн дугаар түр авсан авто тээврийн хэрэгслийн өмчлөгч, жолоочийн хариуцлагыг энэхүү журмын дагуу албан журмын даатгалд хамруулна.

3.3 Монгол Улсын нутаг дэвсгэрээр дамжин өнгөрөх болон түр хугацаагаар орж ирж байгаа авто тээврийн хэрэгслийн эзэмшигч, өмчлөгч нь энэ журмын 1.2 дугаар зүйлд заасан гэрээ хэлэлцээрийн хүрээнд жолоочийн албан журмын даатгалаас чөлөөлөгдөж болно.

/Энэ хэсэгт ХЗДХС, СЗХ-ны даргын 2024 оны 12 дугаар сарын 30-ны өдрийн А/146/499 дүгээр хамтарсан тушаалаар өөрчлөлт оруулсан./

Дөрөв. Даатгалын хугацаа, нөхөн төлбөр

4.1. Даатгалын гэрээг тухайн авто тээврийн хэрэгслийг Монгол Улсын нутаг дэвсгэрт эзэмших, ашиглах хугацаагаар байгуулна.

4.2. Байнгын ачаа эсхүл зорчигч тээвэрлэлт хийдэг, Монгол Улсын хилээр нэвтэрч буй авто тээврийн хэрэгслийн эзэмшигч, өмчлөгчийг даатгалд хамруулахдаа Монгол Улсын эрх бүхий байгууллагаас олгосон улс хооронд тээвэр хийх зөвшөөрлийн хугацааг харгалзан, тухайн хугацаанд даатгалын гэрээ байгуулна.

4.3. Даатгалын нөхөн төлбөрийг дараах байдлаар тооцож олгоно:

4.3.1 даатгагч, жолоочийн даатгалын сан нь хохирогчид олгох нөхөн төлбөрийн хэмжээг хуульд заасан эрх бүхий этгээд, эсхүл даатгалын хохирол үнэлэгчийн дүгнэлт, тодорхойлолт, Жолоочийн даатгалын тухай хуулийн 17 дугаар зүйлд заасныг үндэслэн;

4.3.2 зам тээврийн осолд орсон хохирогчийн амь нас, эрүүл мэндэд хохирол учирсан тохиолдолд даатгуулагчийн гэм буруутай нь тогтоогдсон эсэхээс үл хамааран даатгагч, жолоочийн даатгалын сан нь Жолоочийн даатгалын тухай хуулийн 16, 17 дугаар зүйлд заасан журмын дагуу даатгалын хохирлын хэмжээг тогтоосноос хойш ажлын 10 хоногийн дотор нөхөн төлбөрийг хохирогчид олгох;

4.3.3 даатгалын нөхөн төлбөртэй холбоотой бусад асуудлыг Жолоочийн даатгалын тухай хууль, жолоочийн албан журмын даатгалын гэрээний дагуу зохицуулна.

Тав. Хяналт, хариуцлага

5.1. Энэ журмаар зохицуулаагүй жолоочийн албан журмын даатгалтай холбоотой харилцааг Жолоочийн даатгалын тухай хууль болон бусад холбогдох хууль тогтоомжоор зохицуулна.

5.2. Санхүүгийн зохицуулах хороо болон Хил хамгаалах ерөнхий газар нь энэ журмын хэрэгжилтэд хяналт тавьж, журам зөрчигдсөн тохиолдолд буруутай этгээдэд холбогдох хууль тогтоомжийн дагуу хариуцлага хүлээлгэнэ.

Зургаа. Шилжилтийн заалт

6.1. ОХУ, БНХАУ болон бусад улсын Засгийн газартай байгуулсан Жолоочийн албан журмын даатгалын болон Автотээврийн хэлэлцээрт өөрөөр заасан бол уг хэлэлцээрийг баримтална.

6.2 Энэ журмын 6.1-д заасан хэлэлцээр шинээр батлагдсан тохиолдолд жолоочийн албан журмын даатгалын гэрээг уг хэлэлцээрт нийцүүлэн даатгагч, даатгуулагч шинээр байгуулах үүрэгтэй.

ooOoo